

ea semper responsa dedimus, quibus nos promptos paratosque declaravimus pro pace Ecclesiæ Gallicanæ, quam sincerâ & constanti dilectione prosequimur, quidquid nobis vitæ superesse posset, libenter impendere, atque omnia quæ nobis agenda proponerentur, & aggredi & urgere, dummodò ejusmodi Consilia essent quæ ad avertendum malorum germen apta & idonea dignoscerentur, & quorum executio cum spe prosperi eventûs suscipienda, & ad in tantum finem utiliter processura viderentur.

Gravem atque diurnam de rebus vestris sollicitudinem quâ hætenus affecti fuimus, non parum sublevârunt Litteræ è Gallicani Cleri Comitii die XXI. Octobris elapsi anni ad nos scriptæ, quas quidem legentes, vestram, venerabiles Fratres, firmitatem atque constantiam perspeximus, consensionem in custodiendo veræ sanæque Doctrinæ deposito, & in retinenda quam semper Majores vestri professi sunt ergà Apostolicam B. P. Sedem, Catholicæ unitatis centrum observantiâ & veneratione: neque ullam inter vos dissensionem vigere comperimus quoad Canonicas Regulas & principia, sed scissuras tantummodo esse inter vos in diligendis statuendisque mediis, quibus utendum necessarium est, ut eadem communia principia in usum deducantur: quòd quamvis optandum fuisset longè abesse à Conventu vestro, haud tamen mirum videri debet scientibus id alias inter sacros Antistites & Doctrinâ & morum sanctitate conspicuos, in gravissimarum rerum præctatione evenisse; in magnam autem præconceptæ consolationis nostræ accessionem sese obtulerunt eximie Christianissimi Regis pietas & religio, cum hæreditario ipsius in hanc Apostolicam